

四庫全書

子部

欽定四庫全書

子部

冊府元龜卷二百十三

三五  
六

詳校官中書臣涂日煥

員外郎臣牛稔文覆勘

總校官庶吉士臣何思鈞

校對官學正臣李巖

謄錄監生臣于希賢

謄錄監生臣李如梓

欽定四庫全書

冊府元龜卷二百十三

宋

王欽若等撰

閏位部

求賢命使

求賢

古之爲邦令聞長世者曷嘗不諮訪幽仄詳求髦彥以  
熙王濟俗者哉自南紀建國汜于高齊朱梁莫不延采  
逋逸網羅俊乂俾有位以論薦命輜軒而詢察勤勤懇

懇形於詔令皆所以踐聖哲之風軌隆政教之元本收一代之材濟當世之務者也

宋文帝元嘉十二年詔曰周宗以寧實繇多士漢室之隆亦資得人朕寢寤寤樂賢為日已久而則哲難偕明揚莫効用令遺才在野管庫虛朝永懷前載慙德深矣夫舉爾所知宣尼之彞訓貢士任官先代之成準便可宣勅內外各有薦舉當依方銓引以觀厥用

孝武帝大明六年詔下四方旌賞茂異其有懷真抱素

志行清白恬退自守不交當世或識通古今才經軍國  
奉公廉直高譽在民者具以名奏

前廢帝景和元年八月既誅太宰江夏王義恭等詔曰  
昔凝神佇逸磻溪讚道湛慮思才傳巖岬化朕位御三  
極風澄萬寓資缺電斷正郊斯戮思所以仰宣遺烈俯  
弘景祚每結夢庖鼎瞻言版築有劬日昃無忘昧旦可  
甄訪郡國揖聘閭部其有孝性忠節幽居遐棲信誠義  
行廉正表俗文敏博識幹事治民務加旌舉隨才引擢

庶官方克順彛倫咸敘主者精加詳括稱朕意焉

明帝泰始二年詔曰林澤貞栖丘園耿潔博洽古今敦  
崇孝讓四方在任可明盡搜揚具即以聞隨就褒立

五年九月己未詔曰夫箕頽之操振古所貴冲素之風  
哲王攸重朕屬橫流之會接難晦之辰龕暴翦亂日不  
暇給今雖闕梁蕩靄區縣澄氛偃武修文於是乎在思  
崇廉耻用靜馳薄固已物色載懷寢興竚歎其有貞栖  
隱約息事衡樊鑿坏遺榮負釣辭聘志恬江海行高塵

俗者在所精加搜括特以名聞將貢園矜德茂昭厥禮  
羣司各舉所知以時授爵

後廢帝即位初詔曰夫寢夢期賢往誥垂美物色求良  
前書稱盛朕以冲昧嗣膺寶業思欲仰述聖猷勉弘政  
道興言多士常想得人可普下牧守廣加搜採具有孝  
友門族義讓光閭或匿名屠釣隱采耕牧足以整厲澆  
風扶益淳化者凡厥一善咸無遺逸虛輪佇帛俟聞嘉  
薦

順帝昇明元年詔曰昔聖王既沒淳風已衰龜書永湮  
龍圖長秘故三代之末德刑相擾世淪物競道詖人諛  
然猶正士比穀竒才接軫朕襲運金樞纂靈瑤極負宸  
巡政日晏忘疲永言興替望古盈虛姬夏前載猶傳訓  
謨漢魏餘文布在方冊故元封興茂才之制地節創獨  
行之品振維務本存乎得人今可宣下州郡搜揚幽仄  
標採鄉邑隨名薦上朕將親覽甄其茂異庶野無遺彥  
永激遐芬



南齊武帝永明元年詔王公卿士各舉所知隨方登敘  
八年詔公卿以下各舉所知隨才授職進得其人受登  
賢之賞薦非其才獲濫舉之罰

鬱林王隆昌元年正月詔王公以下各舉所知

明帝建武二年詔王公以下各舉所知

梁高祖天監元年四月詔遣內侍周省四方訪賢舉滯  
若懷寶迷邦蘊竒待價蓄響藏真不求聞達並依名騰  
奏罔或遺隱使輜軒所屆如朕親覽

五年正月丁卯朔詔曰在昔周漢取士方國頃代彫訛  
幽仄罕被人孤地絕用隔聽覽士操淪胥因茲靡勸豈  
其岳瀆鍾靈偏有厚薄寔由知與不知用與不用耳朕  
以菲德君此兆民而兼明廣炤屈於堂戶飛耳長目不  
及四方永言愧懷無忘旦夕凡諸郡國舊邦族內無在  
朝位者選官搜括使郡有一人

十四年正月南郊詔曰朕躬祇明祀昭事上靈臨行宮  
而登泰壇服袞冕而奉蒼璧紫望既升誠敬克展思所

以對越乾元弘宣德教而缺于治道政法多昧實佇羣  
才用康庶績可班下遠近博採英畏若有確然鄉黨獨  
行州閭肥遯立園不求聞達藏器待時未加收採或賢  
才方正孝悌力田並即騰奏具以名上當擢彼周行試  
以邦邑庶百司咸事兆民無隱

普通三年五月詔連帥郡國舉賢良方正直言之士

七年四月詔在位羣臣各舉所知凡是清吏咸使薦聞  
州年舉二人大郡一人

太清元年正月詔可班下遠近博採英畏或德茂州閭  
道行鄉邑或獨行丘壑聞達不求咸使上言以時招聘  
二年正月詔在位各舉所知

四月詔在朝及州郡各舉清人任治民者皆以禮送京  
師

五月詔曰爲國在於多士寧下寄於得人朕暗於行事  
尤闕治道孤立在上如臨深谷凡爾在朝咸思規救獻  
可替否用相啓沃班下方岳旁求俊乂窮其屠釣盡其

巖穴以時奏聞

敬帝太平元年九月詔殊才異行所在奏聞

陳文帝天嘉元年詔曰朕以眇身屬當大寶負荷至重  
憂責實深而庶績未康胥怨猶結延佇賢良發於夢想  
每有一言入聽片言可求何嘗不褒獎抽揚緘書紳帶  
而傳巖虛往空谷尚淹蒲幣空陳旌弓不至豈當有乖  
則哲使華澤遺才將時運澆流今不逮古側食常懷寢  
興增歎新安太守陸山才有啓薦梁前征西從事中郎

蕭策梁前尚書中兵部王暹並世胄清華羽儀著族或  
文史足用或孝德可稱並宜登之朝序擢以不次王公  
已下其各進舉賢良申薦淪屈庶衆才必舉大厦可成  
使棫樸載歌由庚在詠

宣帝大建四年秋九月辛亥大赦天下詔曰與善從諫  
在上之明規進賢謁言為臣之令範朕以寡德嗣守寶  
位雖世襲隆平治非寧一辨方分職旰食早衣旁闕爭  
臣下無貢士何其闕爾鮮能抗直豈余獨運匪薦讜言

置鼓公車罕論得失施石象魏莫陳可否朱雲摧檻良  
所不逢禽息觸楹又為難值至如衣褐以見擔簦以遊  
或者艾絕倫或妙年異等于時而不偶左右莫之譽黑  
貂故敝黃金且殫終其滯淹可為太息又貴為百辟賤  
有十品工拙並驚勸沮莫分街謠徒壅廷議斯闕寔朕  
之弗明而時無獻替永言至治何迺爽與外可通示文  
武凡厥在位風化垂舛朝政紕蠹正色直辭有犯無隱  
兼各舉所知隨才明試其莅政廉穢在職能否分別矢

言俟茲黜陟

後主即位初詔曰夫體國經野長世字氓雖因革儻殊  
弛張或異至於旁求俊乂爰逮側微用適和羹是隆大  
厦上智中主咸繇此術朕以寡薄嗣膺景祚雖哀疚在  
躬情慮昏舛而宗社任重黎庶務殷無繇暫安拱默敢  
忘康濟思所以登顯髦彥式備周行但勞宵夢屬勤史  
卜五就莫來五能不至是用申旦凝慮景夜捐懷豈以  
食玉炊桂無因自達將懷寶迷邦咸思獨善應內外衆



官九品以上可各薦一人以會彙征之旨且取備實難  
舉長或易小大之用明言所施勿使南箕北斗名而非  
實其有負能仗氣擯壓當時著賓戲以自憐草客嘲以  
慰志人生一世逢遇誠難亦宜去此幽谷翔茲天路趨  
銅駝以觀國望金馬而來庭便當隨彼方員訪之矩矱  
北齊孝昭皇帝皇建二年詔內外執事之官從五品已  
上及三府主簿錄事參軍諸王文學侍御史廷尉三官  
尚書舍人每二年之內各舉一人

後主天統三年太上皇帝詔京師執事散官三品已上  
舉三人五品已上各舉二人稱事七品已上及殿中侍  
御史尚書都檢校御史主書及門下錄事各舉一人  
武平三年詔文武官五品以上各舉一人

梁太祖開平元年初受禪求理尤切委宰臣搜訪賢良  
或有在下位抱負器業久不得伸者特加擢用有明政  
理得失之道規救時病者可陳章疏當親鑒擇利害施  
行然後賞以爵秩有晦跡丘園不求聞達者令彼長吏

備禮邀致冀無遺逸之恨

二年七月癸巳以禪代已來思求賢哲乃下令搜訪牢籠之期以好爵待以優榮各隨其材咸使登用宜令所在長吏切加搜訪每得其人則疏姓名以聞如在低位不能自振者有司薦導之如任使後顯立功勞別加遷陟

三年制自開創已來凡有赦書德音節文內皆委諸道搜訪賢良尚慮所在長吏未切薦揚其有卓犖不羈沉

潛用晦負王霸之業蘊經濟之謀究古今刑政之源達  
禮樂質文之奧機籌可以制變經術可以辨疑一事軼  
羣一才拔俗並令招聘旋具奏聞然後試其所長待以  
不次所貴牢籠俊傑採撫英翹

四年九月下詔曰朕聞歷代帝王首推堯舜為人父母  
孰比禹湯睿謀高出於古先聖德普聞於天下尚或卑  
躬待士屈已求賢俯仰星雲慮一民之遺逸網羅巖穴  
恐片善之韜藏延爵祿以徵求設丹青而訪召使其為

政樂在進賢蓋繇國有萬幾朝稱百揆非才不治得士  
則昌自朕光宅中區迄今三載宵分輟寐日旰忘食思  
共力於廟謀庶永清於王道而乃朝廷之內或未盡於  
昌言軍旅之間亦罕聞於竒策眷言方岳下及山林豈  
無英竒副我延佇諸道都督觀察防禦使等或勲高翊  
世或才號知人必於塗巷之賢備察芻蕘之士詔到可  
精搜郡邑博訪賢良喻之以千載一時約之以高官美  
秩諒無求備唯在得人如有卓犖不羈沉潛自負通霸

王之上畧達文武之大綱究古今刑政之源識禮樂質  
文之變朕則待之不次委以非常用佐經綸豈勞階級  
如或一言拔俗一事出羣亦當捨短從長隨才授任大  
小方圓之器寧限九流溫良恭儉之人難誣十室勉思  
薦舉勿至因循俟爾發揚慰予翹渴仍從別勅處分

命使

周官有瑞節之制小雅著皇華之詠至於四方安車之  
適八月輜軒之舉皆命使之謂也自建康數代以汙于

魏齊朱梁曷嘗不順考古道疇咨今典濬發明詔臨遣  
使臣宣布德澤班示政令糾吏治之得失詢民氓之疾  
苦賑災荒以施惠索亡叛以詰姦觀省風俗搜揚逋  
竄察獄犴以盡欽恤之旨勞屯戍以申賜賚之命是皆古  
先令王明達其視聽兢業於幾微之意也斯為邦之要  
道昭德之不訓者歟

吳景帝永安四年八月遣光祿大夫周奕石偉巡行風  
俗察將吏清濁民所疾苦為黜陟之詔

後主鳳皇三年七月遣使者二十五人分至州郡科出  
亡叛

宋高祖永初元年六月丁卯即位丁丑詔曰古之王者  
巡狩省方躬覽民物搜揚幽隱拯災卹患用能風澤遐  
被遠至邇安朕以寡闇道謝前哲因受終之期託兆庶  
之上鑒寐屬慮思求民瘼才弱事艱苦無津濟夕惕永  
念心馳遐域可遣大使分行四方旌賢舉善問所疾苦  
其有獄訟虧濫政刑垂愆傷化擾治未允民聽者皆當



具以事聞方事之宜無失厥中暢朝廷乃眷之旨宣下  
民壅隔之情

文帝元嘉三年正月誅司徒徐羨之等分遣大使巡行  
天下通直散騎常侍袁渝司徒左西掾孔邈使揚州尚  
書三公郎陸子真起部郎甄法崇使荊州員外散騎常  
侍范雍司徒主簿龐遵使南兖州前尚書右丞孔默使  
南北二豫州撫軍叅軍王歆之使徐州冗從僕射車宗  
使青兖州國子博士裴松之使湘州尚書殿中郎阮長

之使雍州前竟陵太守殷道鸞使益州員外散騎常侍  
李耽之使廣州郎中殷斌使梁州南秦州前員外散騎  
侍郎阮園容使交州駙馬都尉奉朝請潘思先使寧州  
並兼散騎常侍班宣詔書曰昔王者巡功羣后述職不  
然則有存省之禮聘類之規所以觀民立政命事考績  
上下偕通遐邇咸被故能功昭長世道歷遠年朕以寡  
暗屬承洪業寅畏在位昧于治道夕惕惟憂如臨深谷  
懼國俗凌頽民風凋偽青厲違和水旱傷業雖躬勤庶

事思弘攸宜而機務惟殷顧循多闕政刑垂謬未獲具  
聞豈誠素弗孚使羣心莫盡納隍之愧在予一人以歲  
時多難王道未一卜征之禮廢而未脩眷彼氓庶無忘  
攸恤今使兼散騎常侍渝等申命四方周行邦邑親見  
刺史二千石官長申述至誠廣詢治要觀察吏政訪求  
民隱旌舉操行存問所疾禮俗得失一依周典每各為  
書還具條奏俾朕昭然若親覽焉大夫君子其各悉心  
敬事無隳乃力其有咨謀遠圖謹言中誠陳之使者無

或隱遺方將敬納良規以補其闕勉哉勗之稱朕意焉  
五月乙巳詔曰夫哲王宰世廣達四聰猶巡嶽省方採  
風觀政所以情偽必審幽遐罔滯王澤無壅九臯有聞  
者也朕以寡薄猥纂洪緒雖永念治道志存昧旦願言  
傳巖發想宵寐而丘園之秀藏器未臻物情民隱尚隔  
親聽乃眷區域輟寢忘食今氛祲祛蕩宇內寧宴旌賢  
弘化於是乎始可遣大使巡行四方其宰守稱職之良  
圭華一介之善悉須列奏勿或有遺若刑獄不卹政治

垂謬傷民害教者具以事聞其高年鰥寡幼孤六疾不能自存者可與郡縣優量賑給博採輿誦廣納嘉謀務盡銜命之旨俾若朕親覽焉

八年閏六月揚州旱乙巳遣侍御史省獄訟申調役

九年六月詔曰益梁交廣境域幽遐治宜物情或多偏壅可更遣大使巡求民瘼

十二年東諸郡大水人民饑饉吳義興及吳郡之錢塘升光三百以司徒左西掾州治中從事史沈演之及尚

書祠部郎江邃並兼散騎常侍巡行拯恤許以便宜從事

孝武以元嘉三十年四月即位五月庚辰詔曰天步艱難國道用否雖基構永固而氣數時愆朕以眇身奄承皇業奉尋歷命鑿寢震懷萬邦風政人治之本感念凌替若疚在心可分遣大使巡省方俗

閏六月遣兼散騎常侍樂詢等十五人巡行風俗

明帝泰始元年十二月即位詔曰朕龕亂寧民屬膺景

祚鴻製初造革道維新而國故頻罹仁澤偏壅每鑒昧  
疚心罔識攸濟巡方問俗弘政所先可分遣大使廣求  
民瘼考守宰之良採衡閭之善若獄犴淹枉傷民害教  
者具以事聞鰥寡孤獨瘡殘六疾不能自存者郡縣優  
量賑給貞婦孝子高行力田詳悉條奏博詢輿誦廣納  
嘉謀每盡皇華之旨俾若朕親覽焉

三年八月丙午遣吏部尚書褚淵慰勞緣淮將帥隨宜  
量賜

後廢帝以泰豫元年四月即位六月壬辰詔曰夫興王  
經制定先民隱方求廣教刑於四維朕以眚眇夙膺寶  
歷永言民政未接聽覽眷言乃顧無忘鑒寢可遣大使  
分行四方觀採風謠問其疾苦令民間有法不便俗者  
悉各條奏若守宰威惠可紀廉勤允著依事騰聞如獄  
訟誣枉職事紕繆情公存私害民利已者無或隱昧廣  
納芻輿之議博求獻藝之規巡省之道務令精治深檢  
行識俾若朕親覽焉



元徽元年九月壬午詔曰我國賦稅蓋有常品往屬戎  
難務先軍實徵課之宜或乖往昔淮湘江州糧運偏積  
調役既繁庶徒彌擾因循權政容有未革民單力弊歲  
月逾甚永言矜歎情兼宵寢可遣使到所明加詳察其  
輸違舊令後非公限者並即蠲改具條以聞

南齊太祖建元元年四月即位五月丙辰詔遣大使分  
行四方遣兼散騎常侍十二人巡行四方以交寧道遠  
不遣使

二年二月遣大使巡慰淮淝徐豫邊民尤貧邁難者刺  
史二千石量加賑卹又遣右衛將軍給事中呂安國出  
司州案集民戶詔曰郢司之間流雜繁廣宜並加區判  
定其隸屬叅詳兩州事無專任安國可暫往經理

三年十二月命散騎常侍虞炎等十二人巡行諸州郡  
觀省風俗焉

海陵王以延興元年七月丁酉即位八月甲辰詔遣大  
使巡行風俗

梁高祖天建元年四月即位詔曰觀風省俗哲后弘規  
狩岳巡方明王盛軌所以重華在上五品聿修文命肇  
基四載斯履故能物色幽微耳目屠釣致王道於緝熙  
被淳風於遐邇朕以寡薄昧于治方籍代終之運當握  
符之重取鑒前古懷若馭朽思所以振民育德去殺勝  
殘解網更張置之仁壽而明慙昭遠智不周物兼以歲  
之不易未遑卜征興言夕惕無忘鑒寐可分遣內侍周  
省四方觀政聽謠訪賢舉滯其有田野不闢獄訟無章

忘公徇私侵漁是務者悉隨事以聞若懷寶迷邦蘊竒待價蓄響藏真不求聞達並依名騰奏罔或遺隱使輒軒所屆如朕親覽焉

三年六月詔曰昔哲王之宰世也每歲下征躬事巡省民俗政刑罔不畢達末代風彫久曠茲典雖欲肆遠忘勞究臨幽仄而居今行古事未易從所以日晏踟躕情同再撫總攬九州遠近人庶或川路幽遐或貧羸老疾懷寃抱理莫繇自申所以東海匹婦致災邦國西土孤

魂登樓請訴念此于懷中夜太息可分將命巡行州部  
其有深寃鉅害抑鬱無歸聽詣使者依原自列庶以矜  
隱之念昭被四方逖聽遠聞事均親覽

敬帝太平元年二月以東土經杜龕張彪抄暴遣大使  
巡省

陳武帝永定元年十月乙亥即位己卯分遣大使宣勞  
四方下璽書勅州郡曰夫四王革代商周所以應天五  
勝相推軒義所以當運梁德不造喪亂積年東夏沸騰

西都蕩覆蕭勃干紀非惟趙倫侯景滔天踰於劉載貞  
陽反篡賊約連兵江左累屬於鮮卑金陵久非於梁國  
自有氤氳混沌之世龍圖鳳紀之前東漢興平之初西  
朝永嘉之亂天下分離未能若於梁朝者也朕以虛薄  
屬當興運自昔登庸首清諸越徐門浪泊靡不征行浮  
海乘山所在戡定冒愬風塵騁馳師旅六延梁祀十剪  
強寇豈曰人謀皆繇天啓梁氏以天祿斯改期運永終  
欽若唐虞推其鼎玉朕東西退讓拜手陳辭避舜子於

箕山之陽求支伯於滄洲之野而公卿敦逼率土翹惶  
天命難稽遂享嘉祚今月乙亥升禮太壇言念遷祠但  
有慙德自梁氏將末頻月亢陽大運斯終秋霖奄降翌  
日成禮園丘宿設埃雲晚霽星象夜張朝景重輪泣三  
危之膏露晨光合璧帶五色之卿雲頤惟寡薄彌慙休  
祉昧旦丕顯方思至治卿等擁旄方岳相任股肱剖符  
名字方寄恤隱玉歷惟新念有欣慶想深求民瘼務在  
廉平慶惠以撫孤貧威刑以禦狡猾若有萑蒲之盜或

犯戎商山谷之首擅強幽險皆從肆赦咸使知聞如或迷途俾在無貸今遣使人具宣往旨念思善政副此虛

懷

時熊曇朗在豫章周迪在臨川留異在東陽陳寶應在晉安共相連結閩中豪帥互相自保帝患之令黃

門侍郎蕭乾往諭之謂曰陸賈南征趙佗歸順隨何奉使黥布來臣追想清風髣髴在目卿宜勉建功名不煩

更勞師放乾至示

以逆順所在歸附

文帝天嘉元年正月遣使者宣勞四方

二月遣使者齎糧爾書宣勞四方

宣帝大建元年正月分命大使巡行四方觀省風俗



二年六月分遣大使巡行州郡省理冤屈

六年四月詔曰戢情懷善有國之令圖拯弊救危聖範  
之通訓近命師薄伐義在濟民青齊舊隸膠光部落久  
患凶戎爭歸有道弃彼農桑忘其衣食而大軍未接中  
途止憇胸山黃郭車營布滿扶老携幼蓬流草跋既喪  
其本業咸事遊手饑饉病疾不免流離可遣大使精加  
慰撫仍出陽平倉穀拯其懸罄并充糧種勸課士女隨  
近耕種石黿等屯適意修墾

後主至德二年正月分遣大使巡省風俗

東魏孝靜帝天平元年十二月遣侍中封隆之等五人為大使巡諭天下

三年十一月詔遣使巡檢河北移饑人

興和元年六月以尚書左僕射司馬子如為山東黜陟大使

北齊文宣帝天保元年五月戊午即位辛未遣大使於四方觀察風俗問民疾苦嚴勅長吏厲以廉平興利除

害務存安靜若法有不便於時政有未盡於事者具條

得失還以聞奏

遣李獎等八人充大使  
巡省方俗問民疾苦

廢帝以天保十年十月即位十一月分命使者巡省四  
方求政得失省察風俗問民疾苦

孝昭帝以皇建元年八月壬午即位壬辰詔分遣大使  
巡省四方觀察風俗問民疾苦考求得失搜訪賢良

武成帝以太寧元年十一月即位詔大使巡行天下求  
政善惡問人疾苦擢進賢良

河清三年九月詔遣十二使巡行水潦免其租調

後主天統五年七月詔使巡省河北諸州無雨處境內  
偏旱者優免租調

梁太祖乾化元年十二月命大理卿王鄴使于安南左  
散騎常侍吳藹使于朗州皆以旌節官告錫之也又命  
將作少監姜弘道為朗州旌節官告使副

冊府元龜卷二百十三

欽定四庫全書

冊府元龜卷二百十四 宋 王欽若等 撰

閏位部

權略 訓兵

權略

夫濟多難建大業以安反側集事機蓋有任夫權謀者  
焉故其智不足仲尼之所非以竒用兵老氏之攸述而  
况天保未定世故糾紛專據一方抗衡上國或經綸伊

始戰鬪未寧或維御方物統制斯在乃有反乎常道奮  
乎英畧理絕於侔揣事等於符契終能成經世之務申  
除惡之志應變之術良可稱焉雖復捨正從譎受譏於  
春秋期於反經合道有濟乎當世易之見幾而作傳之  
好謀而成者皆是之謂矣

蜀先主初在吳時益州牧劉璋網維頽弛周瑜甘寧並  
勸孫權取蜀權以咨先主先主內欲自規乃偽報曰備  
與璋託為宗室冀憑英靈以輔漢朝今璋得罪左右備

獨悚懼非所敢聞願加寬貸若不獲請備當放髮歸於

山林後先主西圖璋留關羽守權曰猾虜乃敢挾詐

魏初

太祖始征柳城先主說劉表使襲許表不從及太祖還表謂先主曰不用君言故失此大會也先主曰今天下分裂日尋干戈事會之來豈有終極乎若能應之於後者則此未足為恨也先主既得成都

曹公自長安舉衆南征先主遙策之曰曹雖來無能為也我必有漢川矣及曹公至先主斂衆拒險終不交鋒積月不拔亡者日多夏曹公果引軍還先主遂有漢中吳大帝初為吳侯漢建安十八年正月曹公出濡須作

油船夜渡洲上權以水軍圍取得三千餘人其沒溺者亦數千人權數挑戰公堅守不出權乃自來乘輕船從濡須口入公軍諸將皆以為是挑戰者欲擊之公曰此必孫權欲身見吾軍部伍耳勅軍中皆嚴精弓弩不得妄發權行五六里迴還作鼓吹公見舟船器仗軍伍整肅喟然嘆曰生子當如孫仲謀劉景升兒子若豚犬耳二十四年劉備將關羽圍樊襄陽偏將軍全琮上疏陳羽可討之計權時已與呂蒙陰議襲之恐事泄故寢琮



表不答及擒羽權置酒公安顧謂琮曰君前陳此孤雖  
不相答今日之捷抑亦君之功也於是封陽華亭侯二  
十五年魏文帝受漢禪權聞魏受禪而劉備稱帝乃呼  
問知星者已分野中星氣何如遂有僭意而以位次尚  
少無以威衆又欲先卑而後倨之為卑則可以假寵後  
倨則必致討然後可以怒衆衆怒然後可以自大故深  
絕蜀而專事魏魏封權為吳王羣臣議以為宜稱上將  
軍九州伯不應受魏封權曰九州伯於古未聞也昔沛

公亦受項羽拜漢王此蓋時宜耳復何損耶遂受之又  
魏欲遣侍中辛毗尚書桓楷往與盟誓并徵任子權辭  
讓不受魏乃命曹休張遼臧霸出洞口曹仁出濡須曹  
真夏侯尚張郃徐晃圍南郡權遣呂範等督五軍以舟  
軍拒休等諸葛瑾潘璋楊粲救南郡朱桓以濡須督拒  
仁時楊越蠻夷多未平集內難未弭故權卑辭上書求  
自改厲若罪在難除必不見置當奉還土地民人乞寄  
命交州以終餘年魏文帝報曰君生於擾攘之際本有

從橫之志降身奉國以享茲祚自君策名以來貢獻盈

路討備之功國朝仰成埋而掘之古人之所耻

國語云埋之

狸掘之是

以無成功朕之與君大義已定豈樂勞師遠臨江漢廊

廟之議王者所不得專三公上君過失皆有本末朕以

不明雖以魯母投杼之疑猶冀言者不信以為國福故

先遣使者犒勞又遣尚書侍中踐修前言以定任子君

遂設辭不欲使進議者恠之又前都尉浩周勸君遣子

乃實朝臣交謀以此卜君君果有辭外引隗囂遣子不

終內喻竇融守忠而已世殊時異人各有心浩周之還

口陳指麾益令議者發明衆嫌終始之本無所據杖故

遂俛仰從羣臣議今省上事款誠深至心用慨然悽愴

動容即日下詔勅諸君但深溝高壘不得妄進若君必

効忠節以解疑議登身朝到夕召兵還此言之誠有如

大江魏畧曰浩周字孔異上黨人建安中仕為蕭令至徐州刺史後領護于禁軍軍沒為關羽所得權襲

羽并得周甚禮之及文帝即王位權乃遣周為牋魏王曰昔討關羽獲于將軍即白先王當發遣之此乃奉欵

之心不言而發先王未深留意而謂權中間復有異圖愚情悽悽用未果決遂值先王委離國祚殿下承統下

情始通公私契濶未獲備舉是令本誓未即昭顯梁寓  
傳命委曲周至深知殿下以為意望權之赤心不敢有  
他願垂明恕保權所執謹遣浩周東里袞至情至實皆  
周等所具又曰權本性空薄文武不昭昔承父兄成軍  
之緒得為先王所見獎飾遂因國恩綏撫東土而中間  
寡慮庶事不明畏威忘德所取重戾先王恩仁不忍遐  
棄既釋其宿罪且開明信雖致命虜庭梟獲開羽功効  
淺薄未報萬一事業未究先王即世陛下踐祚威仁流  
邁私懷情願未蒙照察梁寓來到具知陛下不遂疏遠  
必欲撫錄追本先緒權之得此欣然踊躍心開自明不  
勝其慶權世受寵遇分義深篤今日之事永執一心惟  
察悽悽重垂含覆又曰先王以權推誠已驗軍當引還  
故除合肥之守著南北之信令權長驅不復後顧近得  
守將周泰全琮等白事過月六日有馬步七百徑到橫  
江又篤將馬和復將四百人進到居巢琮等聞有兵馬  
渡江視之為兵馬所擊臨時交鋒大相殺傷卒得此間

情用恐懼權實在遠不預聞知約勒無素敢謝其罪又聞張征東朱橫海今復還合肥先王盟要繇來未久且權自度未獲罪釁不審今者何以發起牽軍遠次事業未訖甫當為國討除賊備重聞斯問深使失圖凡遠人所恃在於明信願殿下克卒前分開示坦然使權誓命得卒本規凡所願言周等所當傳也初東里袞為于禁軍司馬前與周俱沒又俱還到有詔皆見之帝問周等周以為權必臣服而東里袞謂其不可必服帝悅周言以為有以知之是歲冬魏王受漢禪遣使以權為吳王詔使周與使者俱往周既致詔命時與權私宴謂權曰陛下未信王遣子入侍也周以闔門百口明之權因謂周曰浩孔異卿乃以舉家百口保我我當何言耶遂流涕沾襟及與周別又指天為誓周還之後權不遣子而設辭帝乃久留其使到八月權上書謝又與周書曰自道路開通不忘修意既新奉國命加知起居假歸河北故使情問不獲果至望想之勞曷云其已孤以空閭分

信不昭中間招罪以取棄絕幸蒙國恩復見赦宥喜乎  
與君克卒本圖傳不云乎雖不能始善終可也又曰昔  
君之來欲令遣子入侍于時傾心歡以承命徒以登年  
幼欲假年歲之間耳而赤心未蒙昭信遂見討責嘗用  
慙怖自頃國恩復加開導忘其前愆取其後效喜得因  
此尋竟本誓前已有表具說遣子之意想君假還已知  
之也又曰今子當入侍而未有妃耦昔君念之以為可  
上連綴宗室若夏侯氏雖中間自棄常奉戢在心當垂  
宿念為之先後使獲攀龍附驥永自固定具為分惠豈  
有量哉如是欲遣孫長緒與小兒俱入奉行禮聘成之  
在君又曰小兒年弱加教訓不足念當與別為之緬然  
父子恩情豈有已耶又欲遣張子布追輔護之孤性無  
餘凡所欲為今盡宣布惟恐赤心不克暢達是以俱為  
君說之宜明所以於是詔曰權前對浩周自陳不敢自  
遠樂于委質長為外臣又前後辭旨頭尾擊地鼠子自  
知不能保爾許地也又今與周書請以十二月遣子復

欲遣孫長緒張子布隨子俱來彼二人皆權股肱心腹也又欲為子於京師求婦此權無異心之明效也帝既信權甘言且謂周為得其真而權但華偽竟無遣子意自是之後帝既彰權罪周亦見疎遠終身不用

權

遂改年臨江拒守黃武二年八月魏文帝在廣陵吳人

大駭權乃臨江為疑城自石頭至于江乘車以木槓衣以葦席加采飾馬一夕而成魏人自江西望甚憚之遂

退軍

孫休永安元年大將軍孫綝秉政一門五侯皆典禁兵權傾人主有所陳述敬而不違於是益恣休恐其有變



數加賞賜十一月丙申詔曰大將軍忠款內發首建大計以安社稷卿士內外咸贊其議並有勲勞昔霍光定計百寮同心無復是過亟案前日與議定等告廟人各依故事應加爵位者促施行之戊戌詔曰大將軍掌中外諸軍事事統多煩其加衛將軍御史大夫恩侍中與大將軍分省諸事恩者繚之弟頃之休聞繚逆謀陰與張布圖計十二月戊辰臘百寮朝賀公卿升殿詔武士縛繚即伏誅

宋高祖武帝初叅劉牢之軍事孫恩頻攻句章帝屢摧破之恩復走入海三月恩北出海鹽帝追而翼之築城于海鹽故治賊日來攻城城內兵力甚弱帝乃選敢死之士百人咸脫甲胄執短兵並鼓噪而出賊震懼奪氣因其懼而奔之並棄甲散走斬其大帥姚盛雖連戰剋勝然衆寡不敵帝深獨慮之一夜偃旗匿衆若已遁者明晨開門使羸疾數人登城賊遙問劉裕所在曰夜已走矣賊信之乃率衆大上帝乘其懈急奮擊大破之恩

知城不可下乃進向滄瀆帝復棄城追之海鹽令鮑陋遣子嗣之以吳兵一千請為前驅帝曰賊兵甚精以吳人不習戰若前驅失利必破我軍可在後為聲援不從是夜裕多設伏兵兼置旗鼓然一處不過數人明日賊率衆萬餘迎戰前驅既交諸伏皆出舉旗鳴鼓賊謂四面有軍乃退嗣之追奔為賊所沒帝且戰且退賊盛所領死傷且盡帝慮不免至向伏兵處乃止令左右脫取死人衣賊謂當走反停疑猶有伏帝因呼更戰氣色甚

猛賊衆以為然乃引軍去帝徐歸然後散兵稍集

南齊太祖初迎立順帝平西將軍郢州刺史黃回與司徒袁粲相結舉事粲據石頭回頓新亭聞石頭鼓噪率兵來赴之朱雀航有戍軍受節度不聽夜過會石頭已平因稱救援太祖知而不言撫之甚厚遣回西上流涕告別後終誅之回弟駟及從弟馬兄子奴亡逸太祖與征虜將軍王廣之書曰黃回雖有微勲而罪過轉不可容近遂啓請御大小二輿為刺史服飾吾乃不惜為啓

聞正恐得輿復求畫輪車此外罪不可勝數弟自悉之  
今啓依法令廣之於江西搜捕駟等

薛淵為冠軍將軍魏遣薛道標寇壽春帝以道標淵之  
親近勅齊郡太守劉懷慰曰聞道標兒婦並在都與諸  
弟無復同生者凡此類可多方誤之縱不全信足使豺  
狼疑惑令為淵書與道標示購之之意魏得書果追道標  
遣他將代之

武帝不豫時後魏侵邊帝慮朝野憂惶乃力疾召樂府

奏正聲伎

梁高祖義師起陳伯之為齊冠軍據潯陽以距義師及衆軍次潯陽然後歸附與衆俱下伯之頓離門尋進西明門建康城未平每降人出伯之輒喚與耳語高祖恐其後懷讎覆密語伯之曰聞城中甚忿卿舉江州降欲遣刺客中卿宜以為慮伯之未之信會東昏將鄭伯倫降高祖使伯倫過伯之謂曰城中甚忿欲遣信誘卿以封賞須卿復降當生割卿手脚卿若不降復遣刺客殺

卿宜深為備伯之懼自是無異志矣力戰有功

呂僧珍為前軍將軍直殿省孫文川等作亂進燒尚書省及閣道雲龍僧珍帥羽林兵邀擊不能却高祖戎服御前殿謂僧珍曰賊夜來是衆少曉則走矣命打五鼓賊謂已曉乃散官軍捕文川斬于東市

北齊神武性深密高岸終日儼然人不能測機權之際變化若神至於軍國大略獨運懷抱文武將吏罕有豫之諸將出討奉行方略罔不克捷違失指畫多致奔亡

初高祖雖內有遠圖而外迹未見爾朱羽生為殷州刺史高祖密遣李元忠舉兵逼其城令乾率眾偽往救之乾遂輕騎入見羽生與指畫軍計羽生與乾俱出因擒之遂平殷州

文襄東魏孝靜帝武定中為大將軍時侯景據河南反令韓軌討之不克文襄欲間景於梁乃與景書而謬其辭云本使景陽叛欲與圖西西人知之故景更以圖南為事漏其書於梁梁人亦不之信



朱梁太祖乾寧中急攻兗鄆朱瑄求援於太原時李克  
用遣大將李存信率師赴之假道於魏屯於莘縣存信  
御軍無法稍侵魏之芻牧羅弘信不平之太祖因遣使  
謂弘信曰太原志吞河朔迴戈之日貴道堪憂弘信懼  
乃歸款於太祖仍出師三萬攻李存信敗之未幾李克  
用領兵攻魏營於觀音門外屬邑多拔太祖遣葛從周  
援之戰於洹水擒克用男落落以獻太祖令送於弘信  
斬之晉軍乃退是時太祖方圖兗鄆慮弘信離貳每歲

時賂遺必卑辭厚禮弘信每有答貺太祖必對魏使北面拜而受之曰六兄比予有倍年之長兄弟之國安得以常隣遇之故弘信以為厚已

開平五年二月以蔡州順化軍指揮使王存儼權知軍州事蔡人士習叛逆刺史張慎思又裒歛無狀帝追慎思至京而久未命代右廂指揮使劉行琮乘虛作亂因縱火驅擁為度淮計存儼誅行琮而撫遏其衆都將鄭遵與其下奉存儼為主而以衆情馳奏時東京留守博

王友文不先請遂討其亂兵至鄢陵上聞之曰誅行琮  
功也然存儼方懼若臨之以兵蔡必速飛矣遂馳使還  
軍而擢授存儼蔡人安之

乾化元年以權知輝州事前鄆州支使檢校金部郎中  
段知新為輝州刺史仍進階超至銀青光祿大夫進官  
超至檢校工部尚書武威郡開國男食邑三百戶帝英  
果迅邁顧事之繇于司存者皆逶迤不速意甚惡之况  
肇樹丕構方以肥養生物惣一赤縣為念故戎將之超

寵異數咸宜發宸旨靡繇宰司用之以激諸勇毅冀夫  
急效亦王者之權道也

末帝貞明初租庸使趙巖租庸判官邵贊獻議於帝曰  
魏博六州精兵數萬蠹害唐室百有餘年羅紹威前恭  
後倨太祖每深含怒太祖口未屬纊師厚即肆陰謀蓋  
以地廣兵彊得肆其志不如分削使如身使臂即無不  
從也陛下不以此時制之寧知後之人不為師厚邪若  
分割相魏為兩鎮則朝廷無北顧之患矣帝曰善詔以

平盧軍節度使賀德倫為天雄軍節度使遣劉鄩率兵六萬屯河朔詔曰分疆裂土雖賞勳勞建節屯師亦從機便比者魏博一鎮巡屬六州為河朔之大藩實國家之巨屏所分憂寄允為重難將叶事機須期通濟但緣鎮定賊境最為魏博親隣其次相衛兩州皆控澤潞山口兩道並連於并晉分頭常寇於魏封既須日有枝梧未若俱分節制免勞兵力困奔命於兩途稍泰人心俾安居於終日其相州宜建節為昭德軍以澶衛兩州為

屬郡以張筠為相州節度使

訓兵

傳曰春蒐夏苗秋獮冬狩皆於農隙以講武事周禮大司馬之職掌仲春教振旅皆所以訓戎政而簡軍實也自江左建國以逮夫宋梁莫不循經武之制舉治兵之典或考禮於前代或寓令於游畋或閱水戰之備或參華戎之選至迺躬秉武節以明乎申律近處禁囿聿勤於肄習繇是少長有敘卒乘競勸允符申做之義以成

式遏之業故仲尼有言曰以不教民戰是謂棄之斯可  
監也已

吳廢帝亮始親政事時孫綝專政亮乃取兵子弟年十  
八已下十五已上得三千餘人選大將子弟年少有勇  
力者為之將帥亮曰吾立此軍欲與之俱長日於苑中  
習焉

宋太祖在位依故事肄習衆軍兼用漢魏之禮其後講  
武於宣武堂

文帝元嘉五年正月臨玄武館閱武

十六年正月戊寅於北郊閱武

二十年二月於白下閱武

二十五年二月詔曰安不忘危經世之所同治兵教戰有國之常典故服訓明耻然後少長知禁頃戎政雖修而號令未審今宣武場始成便可克日大習衆軍當因郊獵肄武講事

閏二月大蒐於宣武場主者奉詔列奉申攝克日校獵



百官備辦設行宮殿便坐武帳於幕府山南岡設王公百官  
便坐幔省如常儀設南北左右四行旌門建獲旗以表獲車  
殿中郎一人典獲車主者二人收禽吏二十四人配獲  
車十二兩校獵之官著袴褶有帶武冠者脫冠者上纓  
二品以上擁刀備槊麾幡三品以下帶刀皆騎乘將領  
部曲先獵一日遣屯布圍領軍將軍一人督右甄護軍  
將軍一人督左甄大司馬一人居中董正諸軍悉受  
節度殿中郎率獲車部曲在司馬之後尚書僕射都官

尚書五兵尚書左右丞都官諸曹郎令史都官諸曹令  
史幹蘭臺治書侍御史曹令史諸曹令史幹督攝糾司  
校獵非違至日會於宣武場列為重圍設留守填街位  
於雲龍門外內官道南以西為上設從官位於雲龍門  
內大官階北小官階南以西為上設先置官位於行止  
車門外官道東以北為上設先置官還位於廣莫門外  
道之東西以南為上校獵日平旦正直侍中奏中嚴上  
水一刻奏槌一鼓為一嚴上水二刻奏槌二鼓為再嚴

殿中侍御史奏開東中華雲龍門引仗為小駕鹵簿百  
官非校獵之官著朱服集列廣莫門外應還省者還省  
留守填街後部從官就位前部從官依鹵簿先置官先  
行上水三刻奏搥三鼓為三嚴上水四刻奏外辦正次  
直侍中散騎常侍給事黃門侍郎軍校劍履進夾上閣  
正直侍中負鹵簿通事令史帶龜印中書之印上水五刻  
皇帝出著黑介幘單衣乘輦正直侍中負璽陪乘不帶  
劍殿中侍御史督攝黃麾以內次直侍中次直黃門

侍郎護駕在前又次直侍中佩信璽與正直黃門侍郎從護駕在後不鳴鼓角不得誼譁以次引出警蹕如常儀車駕出贊陞者再拜皇太子入守車駕將至威儀唱引先置前部從官就位再拜車駕至行殿前迴輦正直侍中跪奏降輦次直侍中稱制曰可正直侍中俛伏起皇帝降輦登御座侍臣升殿直衛鈚戟虎賁毛頭文衣鷓尾以次列階正直侍中奏解嚴先置從駕百官還便坐幔省帝若躬親射禽變御戎服內外從官以及虎

賁悉變服如校獵儀鉞戟抄鞘以備武衛黃麾內外從  
入圍裏列置部典廣張甄圍旗鼓相望銜枚而進甄周  
圍會督甄令史奔騎號法施令春禽懷孕蒐而不射鳥  
獸之肉不登於俎不射皮革齒牙骨角毛羽不登於器  
不射甄會大司馬鳴鼓蹙圍衆軍鼓譟警角至宣武場止  
大司馬屯旌門二甄帥屯左右旌門殿中中郎率護軍  
部曲入次北旌門內之右皇帝從南旌門入射禽謁者  
以獲車收載還陳於獲旗北王公以下以次射禽各送

詣獲旗下付收禽主者事畢大司馬鳴鼓解圍復屯殿  
中郎率其屬收禽以實獲車充庖厨列言統曹正厨置  
樽酒俎肉于中達以犒饗校獵衆軍至晡正直侍中奏  
嚴從官還著朱服劔戟復鞘再嚴先置官先還三嚴後  
二刻正直侍中奏外辦皇帝著黑介幘單衣正次直侍  
中散騎常侍給事黃門侍郎軍校進夾御正直侍中跪  
奏還宮次直侍中稱制曰可正直侍中俛伏起乘輿登  
輦還衛從如常儀大司馬鳴鼓散屯以次就舍車駕將

至威儀唱引留守填街先置前部從官就位再拜車駕  
至殿前迴輦正直侍中跪奏降輦次直侍中稱制曰可  
正直侍中俛伏起乘輿降入正直次直侍中散騎常侍  
給事黃門侍郎散騎侍郎軍校從至閣亦如常儀正直  
侍中奏解嚴

孝武孝建二年九月丁亥於宣武場閱武

大明五年二月閱武詔曰昔人稱人道何先於兵為首  
雖淹紀勿用忘之必危朕以聽覽餘閒因時講事坐作

有儀進退無爽軍幢以下普量班錫

七年正月詔曰春蒐之禮著自周今講事之誥書于魯  
史所以昭宣德度示民軌則今歲稔氣榮中外寧晏當  
因農隙葺是舊章可克日於玄武湖大閱水師并巡江  
右講武校獵十月戊申幸南豫州癸巳習水軍於梁山  
南齊武帝永明二年八月幸玄武湖講武

四月正月辛宣武堂講武詔曰今親閱六師少長有禮  
領馭羣帥可量班賜



六年九月幸琅邪城講武習水步軍

九年九月幸琅邪城講武觀者傾都普頒酒肉

十年十月幸玄武湖講武

梁武帝大同四年九月閱武于樂遊苑

陳文帝天嘉元年八月幸正陽堂閱武

宣帝大建十一年八月丁卯幸大壯觀大閱武命都督  
任忠領步騎十萬陣於玄武湖都督陳景領樓艦五百  
出于瓜步江帝登玄武門歡宴羣臣以觀之因幸樂遊

苑仍重幸大壯觀集衆軍振旅而還戊寅還宮

後主至德四年九月甲午幸玄武湖肆樓艦閱武

北齊文宣帝受魏禪多所創革六坊之內從者更加簡  
練每一人必當百人任其臨陣必死然後取之謂之百  
保鮮卑又簡華人之勇力絕倫者謂之勇士以備邊要  
梁太祖開平元年十月幸繁臺因農隙以講武事

二年三月幸澤州甲申登東北隅逍遙樓蒐閱騎乘旌

甲滿野

七月幸高僧臺閱禁衛六軍

十一月出開明門登高僧臺閱兵

三年三月幸右軍舊杏園講武

十一月幸榆林坡閱兵教諸部馬步兵

四年正月帝出師子門至榆林坡下閱教

二月帝出師子門幸榆林東北坡教諸軍兵事

十月幸開化門大閱軍實

十二月親閱禁軍命格鬪于教馬亭

乾化元年八月庚申幸保寧殿閱天興控鶴兵事軍使  
將校各有賜丙子閱四番將軍及親衛兵士於天津橋  
南至龍門廣化寺戊寅幸興安鞠場大教閱帝自指麾  
無不踊抃坐作進退聲振宮掖

十月帝北征駐蹕相州癸丑閱武於州闔之南樓丙子  
帝御城東教場閱兵諸軍都指揮北面招討使太尉楊  
師厚總領鐵馬步甲十萬廣亘十數里陳焉士卒之雄  
銳部隊之嚴肅旌旗之雜還戈甲之照曜屹若山嶽勢

動天地帝甚悅焉即命丞相洎文武從臣列侍賜食逮  
晚方歸

二年三月甲午幸貝州之東圍閱武乙未帝復幸東圍  
閱騎軍

冊府元龜卷二百十四

欽定四庫全書

冊府元龜卷二百十五

宋

王欽若等

撰

閏位部

招懷

和好

却貢獻

招懷

傳曰招攜以禮懷遠以德是知有國者務輯寧於初附將誘致於來者而外示其優禮而內彰乎大度俾危疑者得自安之地翔引者無失所之嗟誠接物之宏猷經

遠之大畧也自漢氏之末羣雄並起玄德奮於庸蜀孫氏據有江東其餘趙趙陸梁往往而在莫不懷去就之分審廢興之命跨州連郡以待所歸於是析珪以慰其心遣使以達其意或委質以從命或脩貢以稱藩故能撫有其民人恢拓乎疆宇鼎峙之業雄視二隅繇宋齊以還南北分壤逮夫高齊至於梁氏疆場之事一彼此反側之子改過自新咸用接納存卹俾其安集斯誠君國者之永圖哉



蜀先主初圍劉璋於成都時偏將軍馬超領其父騰部曲依張魯魯不與計事內懷於邑密書請降先主遣人

迎超超將兵徑到城下城中震怖璋即稽首

又云先主使李恢至

廣中交好馬超超遂從命

黃權為劉璋廣漢長及先主襲取益州將帥下郡縣郡縣望風景附權閉城堅守劉璋稽服而詣降先主假權偏將軍

吳大帝初為吳侯建安十五年遣步騭為交州刺史時

士奕為綏南中郎將董督七郡領交趾太守隲到燮率兄弟奉承節度帝加燮為左將軍建安末年燮遣子厥入質帝以為武昌太守諸子在南者皆拜中郎將又誘蕩益州豪姓雍門等率郡人民遙使東附帝益嘉之遷衛將軍弟合浦太守壹時貢馬凡數百疋帝輒為書厚加寵賜以答慰之

嘉禾元年十月魏遼東太守公孫淵遣校尉宿舒閭中令孫綜稱藩於大帝并獻貂馬帝大悅加淵爵位二年

春正月詔以幽青二州十七郡七十縣封為燕王

宋高祖初為晉太尉垣遵與其弟苗並為南燕慕容超委任遵為尚書苗為京兆太守帝圍廣固遵苗踰城歸降並以為太尉行參軍

孝武大明中黜歙二縣有亡命數千人攻破縣邑殺害官長豫章王子尚為揚州刺史在會稽遣主帥領三千人水陸討伐再往失利帝遣殿中侍御史吳喜數十人至二縣誘說羣賊賊即日歸降

明帝即位初南雍州刺史袁顛與晉安王子勛同反帝使朝士遺顛書曰夫夷陂相因興革遞數或多難而固其國或殷憂而啟聖明此既著於前史亦彰於聞見王室不造昏凶肆虐神鼎將淪宗稷幾泯幸天未亡宋乾歷有歸主上體自聖文繼明作睿而辱均牖里屯喻夏臺既天地俱憤義勇同奮克殄鯨鯢三靈更造應天順民爰集寶命四海屬息肩之歡庶民見來蘇之泰吾等獲免刀鋸僅全首領復身奉惟新命承亨運緩帶談笑

擊壤聖世汝雖劬勞於外迹阻京師然心期所寄江漢  
何遠自九江告變皆謂鄧氏狂惑比日國言藉藉頗塵  
吾子道路之議豈其或然聞此之日能無駭惋凶人反  
道敗德日夜滋深昵近狡慝取謀材虎非惟毒流外物  
惡積中朝乃欲毀陵邑虐崇憲燒宗廟鹵御物然後蕩  
覆京都必使蘭猶俱盡自非聖上廟筭靈圖俛首遜避  
維持內外擁衛臣下則赤縣為戎百姓其魚矣此事此  
理寧可熟念既天道輔順百姓謳歌有奉高祖之孫文

皇之子德洞九幽功貫三曜匡拯家國提毓黔首若不  
子民南面將使神器何歸而羣下構慝妄懷窺覲成軫  
惑燕貫高亂趙讒人罔極自古有之汝中京冠冕儒雅  
世襲多見前載縣鑒忠邪何遠遺郎中之清軌近忘太  
尉之純槩相與或羣從舅甥或姻婭周款一旦胡越能  
無悵恨若疑誑所至邪詖無窮汝當誓衆奮戈翦此朝  
食若自延過聽迷途未遠聖上臨物以仁接下以愛豈  
直雍齒先封乃當射鈎見相矣跂予南服寤寐延首若反棹

公流歸誠鳳闕錫珪開寓非爾而誰吾等並過荷曲慈  
俱叨非服紆金拖玉改觀蓬門入奉舜禹之渥出見羲  
唐之化雍容揄揚信白駒空谷之時也奈何毀擲先基  
自蹈凶戾山門蕭瑟松庭誰歸言念楚路豈不思父母  
之邦幸納惡石以蠲美疾裁書表意爾其圖之時尚書  
右僕射蔡興宗是顓舅領軍將軍袁粲是顓從父弟故  
書云羣從舅甥也後又使顓舊門生徐碩奉手詔譬顓  
曰卿歷觀古今險之與強何嘗可恃自朕踐祚塗路梗

塞卿无繇奉表未經為臣今追蹤竇融猶未為晚也

沈文秀為青州刺史與晉安王子勛同反泰始二年八月子勛平帝遣文秀弟文炳詔文秀曰皇帝問前督青州徐州之東莞東安二郡諸軍事建威將軍青州刺史朕去歲撥亂功振普天於卿一門特有殊澤卿得延命至今誰之力邪何故背國負恩遠同逆豎今天下已定四海寧一卿獨守窮城何所歸奉且卿百口在都兼有墳墓想情非木石猶或顧懷故指遣文炳具相宣示凡



諸逆節親為戎首一不加罪文炳所具卿獨何人而能自立便可速率部曲同到軍門別詔有司一無所問如其不爾國有常刑非唯戮及弟息亦當夷卿墳墓既以謝齊土百姓亦以勞將士之心故有今詔三年二月文秀歸命請罪即安本任崔道固為二州刺史與沈文秀同逆會四方平定明帝遣使宣慰道固奉詔歸順

殷琰為建武將軍豫州刺史亦同子勛反叛其將留胡敗走尋陽平定明帝遣琰參軍杜叔寶之從父弟季文

至瑛城下與叔寶語說四方已定勸令時降叔寶曰我  
乃信汝恐為人所誑耳叔寶閉絕子勛敗問有傳者即  
殺之時瑛子邈東在京邑繫建康帝送邈與瑛令說南  
賊已平之間自建康出便防送就道議者以為宜聽邈  
與伯父瑗私相見不爾無以解城內之惑不從邈至叔  
寶等果疑守備方固後帝以南賊降者送瑛城下令與  
城內交言繇是人情沮喪瑛遂降

韋珍奇為汝南郡司馬同殷瑛反瑛降珍奇據城招魏

留勔與珍竒書勸令反魏珍竒乃與子超越羽林監垣式寶於譙殺魏子都贊拔等凡三千餘人勔馳驛以聞明帝大喜以珍竒為使持節都督司北豫二州諸軍事平北將軍司州刺史汝南新蔡縣侯食邑千戶

蕭惠開為平西將軍都督益寧二州晉安王子勛反惠開乃集將佐謂之曰湘東太祖之昭晉安世祖之穆其於當壁並無不可但景和雖昏本是世祖之嗣不任社稷其次猶多吾奉武文之靈兼荷世祖之眷今便當投

袂萬里推奉九江乃遣巴郡太守費欣壽領二千人東下為巴東人任叔兒起義所邀欣壽敗沒峽口道不復通更遣州治中程法度領三千人步出梁州又為氐賊楊僧嗣所斷先是惠開為治多任刑誅蜀士咸懷猜怨及聞欣壽沒法度又不得前晉原一部遂反於是諸郡悉應之並來圍城城內東兵不過二千凡蜀人惠開疑之皆悉遣出子勛尋平蜀人並欲屠城以望厚賞惠開每遣軍出戰未嘗不捷前後所摧破殺傷不可勝計外衆

逾合勝兵者十餘萬人時天下已平明帝以蜀土險遠  
赦其誅責遣惠開之弟惠基步道使蜀具宣朝旨惠基  
既至涪而蜀人志在屠城不使王命遠達留惠基不  
聽進惠基率部曲破其渠帥馬興懷等然後得前惠開  
奉旨歸順城圍得解及還都明帝待之益厚時帝遣惠  
開宗人寶首水路慰勞益州寶首欲以平蜀為功更獎  
說蜀人於是處處蜂起凡諸離散者一時還合渠帥趙  
燕白文章等與寶首屯軍於上去成都六十里衆號二

十萬惠開欲遣擊之將佐咸曰攻破蜀賊誠不為難但慰勞使至未獲奉受而遣兵相距何以自明本心惠開曰今水陸四斷表啟路絕寶首或相誣陷謂我不奉朝旨我之欲戰本在通使若得通則誠心達矣乃作啟事具陳事情使腹心二人帶啟戒之曰須賊破路開便躍馬馳出遣永寧太守蕭惠訓別駕費欣業分兵並進與戰大破之生擒寶首囚於成都縣獄遣使至帝令執送寶首除惠開晉平王長史南郡太守

後廢帝元徽中遣武衛將軍王世武使河南是歲隨拾遺使  
來獻詔答曰皇帝敬聞使持節散騎常侍都督西秦河沙三  
州諸軍事車騎大將軍開府儀同三司領護羌校尉西秦河  
二州刺史新除驍騎大將軍河南王寶命革授爰集朕躬猥  
當大業祇惕蕪懷憂中增感王世武至德元徽五年五  
月二十一日表聞之涇熱想比平安又卿乃誠遙著保  
寶遐疆命詔升徽號以酬忠款遣王世武銜命拜授又  
仍使王世武等往芮芮想即資遣使得時達又奏所上

馬等物悉至今往別牒錦綿紫碧綠黃青等各十疋

南齊太祖建元元年詔曰交趾北景獨隔書朔斯乃前  
運方季負海不朝因迷遂往歸款莫繇曲赦交州部內李  
叔獻一人即撫南土文武詳才選用并遣大使宣揚朝  
恩以試守武平太守行交州府事李叔獻為交州刺史  
東昏侯永元三年後魏東徐州刺史沈陵降以為北徐  
州刺史

梁高祖天監十三年後魏太常博士崔靈恩歸國高祖



以其儒術擢拜員外散騎常侍

元願達魏支庶也天監中為後魏司州刺史因大軍北伐攻義陽願達舉州獻款詔封樂平公侍中

王神念太原郡人天監中以後魏潁川守據郡歸款封南城侯青冀二州刺史

元法僧為後魏鎮東將軍徐州刺史普通六年以彭城內附授司空封始安王法僧魏氏支屬鎮彭城是時魏室亂遂據鎮稱帝魏討之乃歸款請為附庸高祖遣奉

朝請陳慶之與胡龍牙成景雋率諸軍應接及還朝甚  
加優寵時方事招攜賜法僧甲第女樂金帛遷太尉

元樹字君立後魏近屬也仕魏為宗正卿爾朱榮亂歸  
國封為鄴王鎮北將軍

羊侃為魏征東大將軍大通三年歸國詔授安北將軍  
徐州刺史并其兄默及三弟悅元皆拜為刺史

胡僧祐為魏銀青光祿大夫大通三年避爾朱氏之難  
南歸頻上封事武帝器之拜主帥使之送魏北海王元

顓入雒陽僧祐又南歸除南天水天門二郡太守

侯景為魏司徒太清元年求以豫廣潁雒陽西揚東荆  
北荆襄東豫南兗齊等十三州內屬高祖以景為大將  
軍封河南王大行臺承制如鄧屬故事遣同州刺史羊  
鴉仁兗州刺史桓和仁州刺史湛海珍等應接之

孝元帝時湘州刺史王琳以平侯景之勲第一縱暴於  
建業王僧辯啟請誅之琳令長史陸納率部曲前赴湘  
州身輕上江陵陳謝帝以琳下吏使廷尉卿黃羅漢大

舟卿張載宣喻琳軍納等及軍人繫羅漢殺載帝遣僧  
辯討納是時湘州未平武陵王兵下又甚盛江陵公私  
恐懼人有異圖納啟申琳無罪請復本位求為奴婢帝  
乃鎖琳送僧辯時納出兵方戰會琳至僧辯升樓車以  
示之納等投戈俱拜舉軍皆哭曰乞王郎入城即出放  
琳入納等乃降湘州平仍復琳本位

陳高祖永定元年以晉安太守陳寶應為持節散騎常  
侍信武將軍閩州刺史領會稽太守寶應梁末為晉安

太守時東西嶺路寇賊擁隔寶應自海道趨於會稽貢  
獻故有是命

二年三月梁湘州刺史王琳立永嘉王蕭莊於郢州六  
月詔侯瑱討之又遣吏部尚書謝哲諭琳琳請還鎮湘  
州詔追衆軍緩其伐

魯悉達梁末以侯景之亂糾率鄉人保新蔡及晉熙等  
五郡及王琳據有上流琳授悉達鎮北將軍高祖等遣  
趙知禮授征西將軍江州刺史各送鼓吹女樂悉達兩

受之遷延顧望皆不欲降高祖遣安西將軍沈泰潛師襲之不能克濟齊遣行臺慕容紹宗以衆三萬來攻鬱口諸鎮兵甲甚盛悉達與戰敗齊軍紹宗僅以身免王琳欲圖東下以悉達制其中流恐為已患頻遣使招誘悉達終不從琳不得下乃速擊於齊共為表裏齊遣清河王高岳助之相持歲餘會裨將梅天養等懼罪乃引齊軍入城悉達勒麾下數千人濟江而歸高祖高祖見之甚喜曰來何遲也悉達對曰臣鎮撫下流願為藩屏

陛下授臣以官恩至厚矣沈泰襲臣威以深矣然臣所以自歸於陛下者以陛下豁達大度同符漢祖故也高祖笑曰卿言得之矣授平南將軍散騎常侍北江州刺史封彭澤縣侯

宣帝大建十二年八月周使持節上柱國鄖州總管滎陽郡公司馬消難以鄖隨溫應土順沔儼岳等九州魯山甌山沌陽應城平靖武陽上明涓水等八鎮內附詔以消難為使持節侍中大都督總督安隨等九州八鎮諸

軍事車騎將軍司空封隨郡公給鼓吹女樂各一部

東魏孝靜帝興和二年五月西魏行臺宮延和峽州刺史元慶率戶內屬置之河北新附賑廩各有差

武定七年正月梁北徐州刺史湘山侯蕭正表以鎮內附封蘭陵郡公吳郡王

北齊神武為東魏大將軍爾朱榮都督濟州刺史張瓊因爾朱兆敗歸神武用為汾州刺史

堯雄初仕後魏為燕州刺史隨爾朱兆敗於廣阿遂率



所部據定州以歸神武時雄從兄傑爾朱兆用為滄州  
刺史至瀛州知兆敗亦遣使歸降神武以其兄弟俱有  
誠款便留傑行瀛州事尋以雄為車騎大將軍瀛州刺  
史以代傑

王則初隸爾朱仲遠為征虜將軍仲遠敗始歸神武加  
征南將軍金紫光祿大夫

慕容紹宗初為爾朱兆長史神武從鄴討兆於晉陽兆  
窘急走赤嶺自縊而死紹宗行到馬突城見神武追

至遂攜榮妻子及兆餘衆自歸神武仍加恩禮所有官爵並如故軍謀兵略時參預焉

可朱渾元後魏末為渭州刺史侯莫陳悅之殺賀拔岳也周文帝率賀拔岳所部還共圖悅元時助悅走元收其衆入據秦州為周攻圍苦戰結盟而罷元既早為神武知遇兼其母兄在東嘗有思歸之志恒遣表疏與神武陰相往來周文攻圍忌元智勇知元懷貳發兵攻之元乃率所部發自渭州西北烏蘭津周文頻遣兵邀

之元戰必摧之引軍歷河源二州境乃得東出靈州刺  
史曹渥女壻劉豐與元深相交結元因說豐以神武英  
武非常克成大業豐自此便有委質之心遂資遣元從  
靈州東北入雲州神武聞其來也遣平陽守高嵩持金環  
一枚以賜元并運資糧遠遣候接元至晉陽引見執手  
賜帛千疋并奴婢田宅兄弟四人先在并州者進官爵  
元所部督將皆賞以爵邑封元縣公除車騎大將軍  
任延敬廣寧人初從葛榮為賊榮署為王甚見委任榮

敗延敬擁所部先降拜鎮遠將軍廣寧太守

文襄初為東魏大將軍封渤海王時侯景據河南反令韓軌等討之不克議者咸云侯景猶有北望之心但信命不至耳又景將蔡遵道北歸稱景有悔過之心王以為信然謂可誘而致乃遺景書曰先王與司徒契濶夷險孤子相依偏所眷屬義貫終始情存歲寒目為國士者乃立漆身之節饋以一餐者便致扶輪之效況其重於此乎嘗以故舊之義欲將子孫相託方為秦晉之匹

共成劉范之親況聞負杖行歌便以狼顧反噬不蹈忠臣之路乃陷叛人之地力不足以自強勢不足以自保率烏合之衆為累卵之危西取救於宇文南請援於蕭氏以狐疑之心為首鼠之事入秦則秦人不容歸吳則吳人不信當是不逞之人曲為無端之說遂懷市虎之疑乃致投杼之惑昔來舉止事已可見人相疑誤想自覺知闔門大小悉在司寇意謂李氏未滅猶言少卿可扶孤子無狀招禍丁天酷罰但禮絲權奪志在忘私聊

遣偏裨前驅致討南充揚州應時克復即欲乘機席卷縣瓠屬以炎暑欲為後圖且令還師待時更舉今寒膠向折白露將團方憑國靈龔行天罰器械精新士馬強盛內外感恩上下戮力三令五申可赴湯火使旗鼓相望埃塵相接勢如渥雪事等注熒夫明者去危就安智者轉禍為福寧人負我我不負人當開從善之徒使有改迷之路若能卷甲來朝垂橐還闕者當即相授豫州必使終君身世所部文武更不追攝進得保其祿位退

則不喪功名今王思政等皆孤軍偏將遠來深入然其性命在君掌握朕能刺之想有餘力即相加授永保疆場君門眷屬可以無恙寵妻愛子亦送相還仍為通家共成親好君今不能東封函谷南面稱孤受制於人威名頓盡得地不欲自守聚衆不以為強空使身有背叛之名家有惡逆之禍覆宗絕嗣自貽伊戚戴天履地能無愧乎孤于今日不應遣此但見蔡遵道云司徒本無西歸之心深有悔過之意不知此語為虛為實吉凶之

# 理想自圖之

景報書曰僕鄉曲布衣本非藝用出身為國綿歷一紀犯危履難豈避風霜遂得富

貴當年榮華身世一旦舉旗旆援袍鼓北面相抗者何哉實以畏懼危亡恐招禍害故耳往年之暮尊王遺疾神不祐善祈禱莫瘳遂使嬖倖弄權心腹離二妻子在宅無事見圍及迴歸長社希自陳狀簡書未遣鈇鉞已臨既旌旗相對咫尺不遠飛書每奏冀申鄙情而羣帥恃雄眇然弗顧運戟推鋒專欲屠滅掘圍堰水僅存三版舉目相看命懸漏刻不忍死亡出戰城下拘秦送地豈樂為之但禽獸惡死人倫好生僕實不辜桓莊何罪且尊王平昔見於比肩戮力同心共獎帝室雖復權勢參差寒暑小異丞相司徒雁行而已福祿官榮自是天爵勞而後授理不相干欲求吞炭何其謬也然竊人之財猶謂之盜祿去公室抑謂不取今魏德雖衰天命未改拜恩私第何足闕言嗚嗚不能東封函谷授制於人當似教僕賢蔡仲而哀季氏無主之國在禮未聞動而



不法將何以訓竊以分財養幼事歸令終舍宅存孤誰  
云隙末復言僕衆不足以自強身之陷危如累卵然億  
兆夷人卒降十亂紂之百克終自無後潁川之戰即是  
殷鑒輕重繇人非鼎在德苟能忠信雖弱必強殷憂啟  
聖處危何若況今梁道邕熙招攜以禮被我虎文靡之  
好爵方欲苑五岳而池四海掃氛穢以拯黎元東霸甌  
越西通沂隴吳越悍勁帶甲千羣秦兵冀馬控弦十萬  
大風一捲枯幹必摧凝霜暫落秋蒂自殞此而為弱誰  
足稱雄又見誣兩端受疑二國斟酌物情一何太甚昔  
陳平背楚歸漢則強百里出虞入秦斯霸皆昏明繇主  
用舍在人奉禮而行神其吐邪書稱士馬精新尅日齊  
舉誇張形勢必欲相滅切以寒膠白露節候乃同秋風  
揚塵馬首何異徒知北方之力爭未識西南之合從苟  
欲徇意於前途不覺坑穽在其側去危就安今歸正朔  
轉禍為福已脫網羅彼常嗤僕之愚迷此亦笑君之昧  
昧今引二邦揚旌北討熊虎齊奮克復中原荆襄廣穎

已屬闕右項城縣孤亦奉江南幸自取之何勞見援然  
權變非一理有萬塗為君計者莫若割地而和三分鼎  
峙燕魏趙晉足相俸祿齊魯宋衛悉歸大梁使僕得輸  
力南朝北敦姻好束帛自行戎車不駕僕立當世之功  
君卒父禰之業各保疆壘聘享歲時百姓乂寧四方安  
堵孰若驅農夫於隴畝抗勅敵於三方避干戈於首尾  
當鋒鏑於心腹縱太公為將不能獲存歸之高明何以  
克濟來書曰妻子老幼悉在司寇以此見要庶其可反  
當是見疑褊心未說昔王陵附漢母在不歸太公囚楚  
乞羹自若矧伊妻子而可介意脫謂誅之有益欲止之  
不能殺之無損復加阨戮家累在君何闕僕也而遵道  
所說願亦非虛故重陳辭更論款曲所望良圖時惠報  
旨然昔與盟主事等琴瑟讒人間之翻為仇  
敵撫弦擗矢不覺傷懷裂帛還書其何能述

文宣帝天保六年梁司徒都督郢州刺史陸法和舉州

來降帝以法和為大都督十州諸軍事太尉公以西南  
都督五州諸軍事荊州刺史安湘郡公宋蓋為郢州刺  
史義興縣公梁將造為散騎常侍儀同三司湘州刺史  
義興縣公梁將侯瑱來逼江夏齊軍棄城而退法和與  
宋蓋兄弟入朝帝問其竒術虛心相見之備三公鹵簿  
於城南十三里供帳以待之法和遙見鄴城下馬禹步  
卒術謂曰公既萬里歸城主上虛心相待何作此術法  
和手持香爐步從路車至於館明日引見給通幘油絡

網車伏身百人詣闕通名不稱官爵不稱臣但云荊州刺史文宣宴法和及其徒屬於昭陽殿賜法和錢百萬物千段甲第一區田一百頃奴婢二百人生資什物稱是宋莖千段其餘儀同刺史以下各差等

梁太祖開平二年九月帝西幸至於陝幽州都將康君紹等十人自蕃賊寨內來投又幽州騎將高彥章八十人騎先在并州乃於晉州軍前來降至是到行在皆賜分物衣服放歸本道以示懷服

三年二月同州節度使劉知俊奏延州都指揮使高萬興部領節級家累三十八人來降三月以萬興檢校司徒為丹延等州安撫招誘等使又八月制左憑背叛元惡遁逃如聞相濟之徒多是脅從之輩若能迴心向國轉禍全身當與加恩必不問罪仍令同華雍等州切加招諭如能梟斬溫韜或以鎮寨歸化必加厚賞仍獎官班兼委本界招復人戶切加安存

閏八月襄陽叛將李供差小將進表帝示以含弘特賜

勅書慰諭

四年二月賜潞州投歸軍馬張行恭錦服銀帶并食

五年二月武安軍節度使馬殷進呈虔州刺史盧延昌  
牋表虔州北支郡也兵甚銳自得韶州益强大昇為百  
勝軍使始洪州之陷盧光稠願收復使府立功自劾上  
因兼授江西觀察留後光稠卒復命延昌領州事方伯  
亦頗慰薦揚渭遣人為署爵秩延昌佯受官牒禮遣其  
使因胡南自表其事曰郡小寇迫欲緩其姦謀且開導

貢路非敢貳也以其為制來自陳上覽奏曰我方有北  
事不可不爾甚加撫卹尋兼授鎮南將軍節度使觀察  
留後命使慰勞

乾化元年六月乙卯命北面都招討使鎮國軍節度使  
楊師厚出屯邢維丁巳鎮定鈔我蕩陰詔曰常山背義  
易水傲尤誘其蕃戎動我邊鄙南侵相魏東出邢維是  
用遣將徂征為人除害但初頒赦令不欲食言宥而伐  
之諒非獲已况聞謀始不自帥臣致此厲階並繇奸佞

密通人使潛結犬戎既懼罪誅乃生離叛今雖行討伐已舉師徒亦開詔諭之門不阻歸降之路矧又王鎔處置未曾削爵除名若翻然改圖不遠而復必仍舊貫當保前功如有率衆向明拔州效順亦行殊賞冀徇來情免令受弊於疲民用示惟新於汚俗宜令行營都招討使及陳暉軍前准此勅文敬加招諭將安衆懼特舉明恩鎮州只罪李宏規一人其餘一切不問

末帝貞明元年三月邠州留後李保衡以城歸順保衡



楊崇本養子崇本又李茂貞養子任邠州二十餘年去歲為其子彥魯所毒彥魯權知州事五十餘日保衡殺彥魯送款於帝即以保衡為華州節度使以河陽留後霍彥威為邠州節度使

和好

自三代之季天統棄絕皇綱不振豪傑並立干戈日熾禹跡幅裂互奪我疆桀犬吠堯各是其主勢未服德民思息肩則必奉春秋之盟以修鄰好達往來之使申其

聘禮用和為貴無言不酌惠養疲甿保守封畧力穡以  
滋其調度通商以便其有無至於天災流行交相救卹  
顧謀靈命質諸鬼神蓋以隨時之大義弭兵之良術也  
蜀先主之得成都也吳孫權使使報欲得荊州先主言  
須得涼州當以荊州相與權忿之乃遣呂蒙襲長沙零  
陵桂陽三郡先主引兵五萬下公安令關侯入益陽會  
曹公定漢中張魯遁走巴西先主聞之與權連和分荆  
州江夏長沙桂陽東屬南郡零陵武陵西屬引兵還江

州權使大中大夫鄭泉來聘因謂其羣臣曰近得玄德

書

玄德先主字

已深引咎求復舊好前所以名西為蜀者以

漢帝尚存故耳今漢已廢自可名為漢中王也

章武二年先主侵吳為吳所敗先主駐白帝大帝甚懼遣使請和先主許之遣大中大夫宗瑋報命

後主建興元年吳遣信都尉馮熙來聘且弔喪也是歲南中諸郡並皆叛亂丞相諸葛亮以新遭大喪故未便加兵遣尚書郎鄧芝固好於吳致馬二百匹錦千段及

方物

二年夏吳遣輔義中郎將張溫來聘亦致方土所出以  
答厚意遂為與國是年後主又遣鄧芝聘於吳重結盟  
好權謂芝曰山民作亂邊守兵多輒慮曹丕乘空美態  
而反求和議者以為內有不暇幸來求和於我有利宜  
當與通以自辨定恐西川不能明孤赤心用致嫌疑孤  
土地邊外間隙萬端而長江巨海皆當防守丕觀釁而  
動惟不見便寧得志比復有他圖芝再使吳帝數與芝

相間饋遺優渥

七年吳大帝稱尊號其羣臣以並尊二帝來告議者咸  
以為交之無益而名體弗順宜顯名正義絕其盟好丞  
相諸葛亮曰吳有僭逆之心久矣國家所以略其釁情  
者求犄角之援也今若加顯絕雋我必深便當移兵東  
成與之角力須并其土乃議中原彼賢才尚多將相輯  
睦未可一朝定也頓兵相持坐而須老使北賊得計非  
策之上者昔孝文卑辭匈奴先帝優與吳盟皆應權通

變弘思遠益非丈夫之為忿者也今議者咸以權利在  
鼎足不能并力且志望已滿無上岸之情推此皆似是  
而非也何者其智力不侔故限江自保權之不能越江  
猶魏賊之不能渡漢非力有餘而利不取也若大軍致  
討彼高當分裂其地以為後規下當畧民廣境示武於  
內非端坐者也若就其不動而睦於我我之北伐無東  
顧之憂河南之衆不得盡西北之為利亦已深矣權借  
之罪未宜明也乃遣衛尉陳震慶權正號震到武昌大

帝與震升壇歆盟交分天下以徐豫幽青屬吳并涼冀  
兗屬漢其司州之土以函谷關為界造為盟曰天降喪  
亂皇綱失叙逆臣乘釁劫奪國柄始於董卓終於曹操  
窮凶極惡以覆四海至今九州幅裂普天無統民神痛  
怨靡所戾止及操子丕祭逆遺醜薦作姦回偷取天位  
而敵么膺尋丕凶蹟阻兵盜土未伏厥誅昔共工亂象  
而高辛行師三苗干度而虞舜征焉今日滅敵禽其徒  
黨非漢與吳將復誰任夫討惡翦暴必聲其罪宜先分

裂奪其土地使士民之心各知所歸是以春秋晉侯伐  
衛先分其田以畀宋人斯其義也且古建大事必在盟  
誓故在周禮有司盟之官尚書有告誓之文漢之與吳  
雖信絲中然分土裂境宜有盟約諸葛亮丞相德威遠  
著翼戴本國典戎在外信感陰陽誠動天地重復結盟  
廣誠約誓使東西士民咸共聞知故立壇殺牲昭告神  
明再畝加書副之天府天高聽下靈威聿譔司慎司盟  
羣臣羣祀莫不臨之自今日漢吳既盟之後戮力一心



同討魏賊救危卹患分災共慶好惡齊之無或携貳若  
有害漢則吳伐之若有害吳則漢伐之各守分土無相  
侵犯傳之後葉克終若始凡百之約皆如載書信言不  
豔實居於好有渝此盟創禍先亂違貳不協愆慢天命  
明神上帝是討是督山川百神是糾是殛俾墜其師無  
克祚國於茲大吳神明鑒之是歲吳黃龍元年也

吳大帝初為吳王黃武元年以使聘魏具破蜀軍獲印  
綬及首級所得土地并表將吏功勤宜加爵賞之恩文

帝報使致颯子裘明光鎧駢馬又以素書所作典論及詩賦與權詔曰老虜邊窟越險深入曠日持久內迫罷弊外困智力故見身於雞頭分兵擬西陵其計不過謂可轉足前迹以搖動江東根未著地摧折其支雖未剗脩五臟使身首分離其所降誅亦足使虜部衆兇懼昔吳漢先燒荊門後廢夷陵而子陽無所逃其死來歙始襲略陽文叔喜之而知隗囂無所施其巧今討北虜正似其事將軍勉建方畧務全獨克

景帝永安六年十月蜀以伐魏來告使大將軍丁奉督諸軍向魏壽春將軍留平別詣施績於南郡議兵所向將軍丁封孫異如沔中皆救蜀蜀主降魏問至前後罷後主元興元年晉司馬昭為魏相國遣昔吳壽春城降將相國參軍徐紹散騎常侍水曹屬孫或齎書喻皓以平蜀之事致馬錦等物以示威懷書曰聖人稱有君臣然後有上下禮義是故大必字小小必事大然後上下安服羣生獲所逮至末塗純德既毀勦民之命以爭強

於天下違禮順之至理則仁者弗繇也方今主上聖明  
覆幬無外僕備位宰輔屬當國重唯華夏垂殊方隅圮  
裂六十餘載金革亟動無年不戰暴骸喪元困悴罔定  
每用悼心坐以待旦將欲止戈興仁為百姓請命故分  
命偏師平定蜀漢後未經年全軍獨克於時猛將謀夫  
朝臣庶士咸以奉天時之宜就既征之軍藉吞敵之勢  
宜遂回旗東指以臨吳境舟師汎江順流而下陸軍南  
轅徑取四郡兼成都之械漕巴漢之粟然後以中軍整

旅三方雲會未及浹辰可使江表底平南夏順軌然國  
朝深惟伐蜀之舉雖有靖難之功亦悼蜀民獨罹其害  
戰於綿竹者自元帥以下並受斬戮伏尸蔽地血流丹  
野一之於前猶追恨不忍況重之於後乎是故旋師紫  
甲思與南邦共全百姓之命夫料力忖勢度資量險遠  
考古昔廢興之理近鑒西蜀安危之效隆德保祚去危  
即順屈己以寧四海者仁哲之高致也履危偷安隕德  
覆祚而不稱於後世者非智者之所居今朝廷徐紹孫

或獻書喻懷若書御於前必少留意回慮革筭結歡弭  
兵共為一家惠於吳會及於中土豈不泰哉此昭心之  
大願也敢不承受若不獲命則普天率土期於大同雖  
重干戈固不獲已也

甘露元年三月皓遣使隨紹或報書曰知以高世之才  
處宰衡之任漸導之功勤亦至矣孤以不德階承統緒  
思與賢良共濟世道而以壅隔未有所緣嘉意久著深  
用依依今遣光祿大夫紀陟五官中郎將弘璆宣明至

德江表傳載皓書兩言白稱名言而不著姓陟璆至雒遇晉王相國薨乃遣

還

寶鼎元年正月遣大鴻臚張儼五官中郎將丁忠弔祭

晉王相國

宋高祖大明四年十二月後魏遣通和

明帝太始五年十一月魏人來和

七年三月魏人來聘

後廢帝元徽元年正月魏人來聘

三年六月魏人來聘

南齊武帝永明元年八月魏人來聘十月使騎將軍劉

纘聘於魏

二年十二月魏人來聘

三年三月使輔國將軍劉纘聘於魏十一月魏人來聘

四年二月使通直郎裴昭明聘於魏

七年九月魏人來聘十一月詔平南參軍顏明聘於魏

八年六月魏人來聘



九年正月詔射聲校尉裴昭明聘于魏五月魏人来聘  
八月使司徒參軍蕭琛聘于魏十月魏人来聘

十年二月使司徒參軍蕭琛聘于魏

十一年四月魏人来聘

廢帝以永明十一年七月即位十一月魏人来聘

隆昌元年正月使司徒參軍劉敷聘于魏

海陵王延興元年八月魏人来聘

梁高祖普通七年十月放魏揚州刺史李憲還北

大通二年六月魏臨淮王元或求還本國許之十月以魏北海王元顥為魏主遣東宮直閣將軍陳慶之衛送還北魏

中大通元年正月魏汝南王元悅求還本國許之二年六月遣魏太保汝南王元悅還北為魏主八月庚戌輿駕幸德陽堂設絲竹會祖送魏王元悅

四年正月以太子左率衛薛法護為平北將軍司州牧衛送元悅入雒二月以親除太尉元法僧還北為魏王

大同二年十二月東魏請通和許之

三年七月東魏遣使來聘九月使兼散騎常侍張臯聘于東魏

四年五月東魏遣使來聘七月使兼散騎常侍劉孝儀聘于東魏

五年十一月東魏遣使來聘十二月使兼散騎常侍柳彧聘于東魏

六年七月東魏遣使來聘是月遣兼散騎常侍陸晏于

報聘

七年四月東魏遣使來聘是年遣兼散騎常侍明少遐  
報聘十一月東魏又遣使來聘是月遣兼散騎常侍來  
狎報聘

十一年四月東魏遣使來聘

太清元年十二月遣太子舍人元貞還北為東魏主

二年七月使兼散騎常侍謝琿聘于東魏結和

元帝太清五年

簡文太實二年也時帝承  
制於江陵猶稱太清年號

二月魏遣使

來聘

承聖元年五月魏遣來賀平侯景

敬帝太平元年二月齊人來聘使侍中王廓報聘

二年四月齊遣使請和

太平元年三月後齊軍繼至陳霸先皆大敗之至是通和

陳文帝天嘉二年六月齊人通好

三年四月齊遣使來聘

五年四月周遣使來聘五月周齊並遣使來聘十二月

齊遣使來聘

六年四月

一作六月

周遣使來聘十月齊遣使來聘

廢帝天康元年四月即位十一月周人來弔國哀

宣帝大建元年五月齊遣使來聘

二年五月齊遣使來弔

三年四月齊遣使來聘五月周遣使來聘

四年八月周遣使來聘

五年五月周遣使來聘

六年正月周遣使來聘

七年八月周遣使來聘

東魏孝靜帝天平四年七月遣使散騎常侍李楷使于梁十二月梁武遣使來

元象元年十月梁武遣使來十二月遣陸操使于梁

興和元年六月梁武遣使來八月遣兼散騎常侍王元景使于梁

二年三月梁武遣使來五月遣兼散騎常侍李象使于梁十月梁武遣使來十二月遣兼散騎常侍崔謙使于

梁

三年六月梁武遣使來八月遣兼散騎常侍李騫使于

梁

四年正月梁武遣使來四月遣散騎常侍李繪使于梁  
十月梁武遣使來十二月遣兼散騎常侍楊裴使于梁  
武定元年六月梁武遣使來八月遣兼散騎常侍李渾  
使于梁

二年三月梁武遣使來五月遣兼散騎常侍魏季景使



于梁十一月梁武遣使來

三年正月帝遣兼散騎常侍李獎使于梁七月梁武遣使來十月遣中書舍人尉瑾使于梁

四年五月梁武遣使來七月遣兼散騎常侍元廊使于梁

五年正月梁武遣使來四月帝遣兼散騎常侍李緯使於梁

六年九月梁武遣使來

七年二月遣兼散騎常侍鄭伯猷使于梁時魏收為散騎常侍兼中書舍人自魏梁和好書下紙每云想彼境內寧靜此率土安和梁後使其書乃去彼字自稱猶著此欲示無外之意收定報書云想境內清晏今萬國安和梁人復書依以為禮

北齊文宣帝天保元年十一月梁相東王蕭繹遣使朝貢

二年正月梁相東王蕭繹遣使朝貢四月十日又遣使

朝貢

三年十一月梁王蕭繹即帝位于江陵是為元帝遣使來聘

四年閏十一月梁元帝遣使來聘

五年十月西魏伐梁元帝于江陵語清河王岳等率眾救之未至而江陵陷梁元帝為西魏將于謹所殺梁將王僧辯在建康共推晉安王蕭方智為太宰都督中外諸軍事承制置百官

六年正月清河王岳以衆軍渡江尅夏首送梁郢州刺

史陸法和詔以梁散騎常侍貞陽侯蕭明為梁王遣尚

書左僕射上黨王渙率衆送之五月蕭明入於建鄴

按梁

書云七月入於京師

六月詔曰梁國遘禍主喪臣離邊彼炎方盡

生荆棘興亡繼絕義在於我納以長君拯其危弊比送

梁主已入金陵蕃禮既修分義方篤越鳥之思豈忘南

枝凡是梁民宜聽反國以禮發遣是月梁主蕭明遣其

子章兼侍中袁泌兼散騎常侍楊裕奉表朝貢初明在

梁為豫州刺史

明梁武  
兄子

兵敗為魏擒之世宗

高

禮明甚

重謂之曰先王與梁王和十有餘年聞彼禮佛文嘗云  
奉為魏主井及先王此甚是梁王厚意不謂一朝失信  
致此紛擾自出師薄伐無戰不克無城不陷今日欲和  
非是力屈境上之事知非梁主本心當是侯景違命扇  
動耳朕可遣使諮論若猶存先王分義重成通和者吾  
不敢違先王之旨侯及諸人並即放還於是使人以明  
書告梁主梁主乃致書以慰世宗是歲梁元帝為西魏

所滅顯祖詔立明為梁主前所獲梁將湛海珍等皆聽從明歸令上黨王渙率衆以送是時梁太尉王僧辯司空陳霸先在建康推晉安王方智為丞相顯祖賜僧辯霸先璽書僧辯未奉詔上黨王進軍明又與僧辯書往復再三陳禍福僧辯初不納既而上黨王破東關斬裴之橫江表危懼僧辯乃啓上黨王求納明遣舟艦迎接上黨王饗梁朝將士及與明刑牲歃血載書而盟於梁與東度齊師比及侍中裴英起衛送明入建康遂稱尊

號以智方為太子是冬霸先襲殺僧辯復立方智以明為太傅明疽發背殂

八年十月陳高祖武帝立遣使稱藩朝賀

十年三月梁主蕭莊至郢州遣使朝貢九月使酈懷則陸仁惠使於蕭莊莊在梁為永嘉王蕭明殂帝以莊主梁祀自溘賊城濟江即位于郢州莊為陳人所敗入朝封侯朝廷許以興復竟不果

武成帝河清元年正月詔散騎常侍崔瞻聘于陳十月

陳人來聘十一月詔兼散騎常侍封孝琰使于陳十二月陳人來聘

三年四月詔兼散騎常侍皇甫亮使于陳六月歸宇文媪于周九月歸閻媪于周陳人來聘

四年四月陳人來聘

後主天統元年六月太上皇帝詔兼散騎常侍王季高使于陳

二年三月陳人來聘六月太上皇帝詔兼散騎常侍韋



道儒聘於陳十二月陳人來聘

三年四月太上皇帝詔兼散騎常侍司馬幼之使于陳  
九年周人來通和太上皇帝詔侍中斛斯文略報聘于  
周十一月太上皇帝詔兼散騎常侍李諧使于陳

五年二月詔侍中比烈長文使于周

武平元年正月詔兼散騎常侍裴讞之聘于陳

二年正月詔兼散騎常侍劉環雋使于陳四月陳遣使  
連和謀反周朝議弗許九月陳人來聘十一月詔侍中

赫連子佺使于周

三年三月周人來聘八月使領軍封輔相聘于周九月

陳人來聘

四年正月詔兼散騎常侍崔象使于周二月周人來聘  
四月又來聘六月詔開府王師使于周

却貢獻

古者貢獻之制有藝有極苟非其道庸可取乎觀夫宋  
齊而下逮於梁室雖眷命攸屬而運歷非正乃有恭已

修德稽古發號不寶遠方之物不納非時之貢志存抑損道符簡易斯亦一時之美足垂於後焉

宋高祖永初中廣州嘗獻入洞細布一端八丈惡其精麗勞人即付有司彈太守以布還之并制嶺南禁作此布帝素有熱病并患金創末年尤劇坐卧常須冷物後有人獻石牀寢之極以為佳乃嘆曰木牀甚費而況石邪即令毀之

南齊太祖建元元年四月即位斷四方上慶禮

明帝建武元年十月即位詔斷遠近上禮又詔蕃牧守  
宰或有薦獻事非任土嚴加禁斷十一月立皇太子詔  
東宮肇建遠近或有慶禮可悉斷之

二年十一月皇太子納妃褚氏斷慶禮

三年閏十二月皇太子冠斷遠近上禮

梁高祖天監元年四月即位斷遠近上慶禮八月交州  
獻能歌鸚鵡詔不納

二年五月斷諸郡縣獻奉二宮唯諸州及會稽職惟岳

牧許薦任土若非地產亦不得貢

十四年正月朔皇太子冠停遠近上慶禮

陳宣帝大建七年四月監豫州陳桃根於所部得青牛  
獻之詔遣還民

梁太祖乾化二年以丁審衢為陳州而審衢厚以鞍馬  
金帛為謝恩之獻帝慮其漁民復其獻而停之

冊府元龜卷二百十五